

THE UNIVERSITY OF CHICAGO

CHICAGO, ILL. 60637

欽定剿平捻匪方略卷四十七 戊午年

八月初三日 乙巳 袁甲三奏言安徽懷鳳捻匪被

剿情急分段向靈睢一帶竄突七月十二日復

有馬步賊二三千人向孟家灣盧家大洲撲來

並圍攻連城民洲欲由澮河偷渡北犯經臣飭

令遊擊滕家勝等星夜分投迎剿該逆向南回
竄兵團合力追殺二十餘里斃賊百餘人生擒

二十餘人奪獲旗幟器械無算十三日馬隊巡
哨至何家集搜殺三十餘人擒首張落刑邀集
各圩擒首陸連科李允等四五千人襲破陳家
莊民圩撲入夏家圩年家圩等處臣派副將王
鳳祥等率領馬步兵勇二千人馳赴元縣進剿
苗沛霖由南路兜剿馬隊直抵陳家圩力攻四
時之久轟斃多賊二十四日王豹文等由西南

抄襲賊圩圩賊奔逃大股賊隊立時驚亂向西
南奔潰我軍追殺三四百名生擒長髮老捻首
余廣遠等並擒夥三十餘名將陳韓二圩平毀
牟玉田等各帶馬隊協剿至洪溝集大興集等
處遇賊接仗先後殺斃二百餘名奪馬三十餘
匹年夏兩圩亦卽攻克其西南路逆擒先經伊
興額擊退追近小高莊賊圩復出千餘人迎拒

我軍奮勇分擊殺賊六七百名傾跌落水死者
無數奪馬三十餘匹蒙亳賊圩馬步二萬餘人
竄近岳家集伊興額誘賊過橋揮隊回擊斃賊
二百餘名淹斃不少官軍過河追殺賊復大至
官軍背水力戰三時之久殺賊一千三四百人
現在西南各圩賊勢尙重無論永城以西竄路
甚多卽由永至宿一百四十里祇有濉溪一營

儻該逆拌命繞越亦於北路全局大有關礙臣
先已飛飭歸徐兩屬各州縣及朱連泰等一體
嚴防並恐伊興額兵力尙單已酌撥馬步二千
餘人交王鳳祥帶赴濰溪口協同截剿臣仍督
飭各營進紮固鎮與勝保合力規取懷鳳此次
各路獲捷員弁兵勇均屬踴躍用命所有尤爲
出力之參將博崇武都司高玉振驍騎校佟陞

德祥台祥領催伊朗阿等合無仰懇

天恩給予獎敘奏入

上諭內閣曰官軍截擊捻匪屢獲大勝攻克四圩勦辦
尙屬得手所有尤爲出力之卽補參將博崇武著免
補參將以副將儘先補用先換頂戴候補都司高玉
振著免補都司以遊擊卽補委驍騎校佟陞著以驍
騎校儘先升用儘先驍騎校德祥著賞換花翎領催

伊朗阿委驍騎校台祥均著以驍騎校儘先升用並
賞換花翎其餘在事出力人員著袁甲三彙案保奏
候朕施恩

袁甲三又奏言山東蘭陵捻匪翟三禿孜等被
東省擊剿向銅邳宿睢各界奔竄意圖勾結懷
鳳大股經徐州道王夢齡督率兵勇將該匪殲
除殆盡生擒賈九蕭英聶九等各擒首翟匪逃

回東境近因廬州復陷淮北人心不免震動當
派候補知府張學醇帶馬隊二百名由固鎮一
路沿途督飭靈泗各地方官整齊團練嚴密防
守並直抵五河縣浮山口一帶查看情形隨時
照顧其淮北鳳五毗連各練總亦經臣飭令與
官兵聯絡聲勢以固藩籬奏入報

初四日丙午德興阿奏言滁州賊匪竄至水口富

明阿派營總常壽等帶領兵勇分投夾擊斃賊
百餘名餘匪爭渡淹斃甚衆官軍抵黃土嶺賊
衆分撲而來我軍分左右翼包裹該逆拌死回
竄我軍追殺十餘里王富來手刃黃衣賊目一
名水口接應大股賊匪俱被官軍衝擊敗回共
計殺賊六七百名生擒長髮捻匪二十四名砍

獲首級六十一顆奪獲旗幟器械多件和州賊
匪竄擾趙家莊等處經魁霖率隊往擊斃賊二
十餘名該逆敗回我兵復追殺數名臣查滁逆
進犯水口難保非窺伺來六現派博奇帶領馬
隊一起卽赴六合與富明阿溫紹原會合勦辦
至西路和全之賊皆係悍黠儻防禦稍鬆彼卽
乘虛而入鞠殿華於進勦烏衣獲勝後卽由小

店至高旺暫駐石磧橋等處仍飭各營嚴加防
範並率隊往湯泉新甸廠大劉莊一帶周視有
無賊蹤相機防剿

德興阿又奏言探聞廬州之賊與全椒等處通
爲一氣欲由和州烏江撲擾浦口六合打通江
路救應金陵又報和州烏江俱已添賊石磧橋
一帶喫緊異常是以特囑鞠殿華分兵前往加

意防閑伏查數日以來粵匪由廬州謀竄浦口
六合捻匪已過臨淮會合粵逆現並由全滁偏
近亦復謀竄浦六金陵首逆結聯七里洲九汊
洲等處賊匪日備船隻又欲由江路竄來浦營
以區區一萬數千之兵勇分布二百餘里之地
而各路粵捻三面撲來實有防不勝防之勢前
次請撥馬隊七百名伏祈速卽

飭撥南來以資協剿

德興阿又奏言 臣接勝保來咨滁州賊首李兆
受率黨乞降人衆四五萬口糧無出求俟中秋
收糧後薙髮來歸分遣內應收復城邑先獻滁
州等語 臣聞滁州城內有洪逆親信之楊國宗
在彼主持又有僞合天義李受承近在和州一
帶管理羣賊安能任李兆受縱橫如意率衆數

萬束手來降至云俟收糧後來歸收糧則必擄掠出境臣營逼近賊壘又安肯任其肆行荼毒現據富明阿稟報李兆受進用移文移知來安縣自述業已投誠並蒙保舉但有不便之事未及獻城李受承又疊催攻打水口來安若漫無動作不能回覆伊來必不騷擾一到卽回囑該縣知會營員不必認真云云臣思近來滁賊疊

踞烏衣水口窺伺六合官軍迎勦俱抵死抗拒
又據獲賊供李兆受卽長受又名李禿子日在
烏衣等處督戰是不特投誠之說未必可憑卽
此次移文尤恐居心叵測現仍密飭各營曉夜
偵探加緊防範並知會勝保彼此同加儆備奏
八

上命軍機大臣傳諭德興阿曰所請調撥馬隊已據僧